


T5449 |  
~~CHL 5531~~ / 1944


3

9











既堂續集卷之五

焦獲孫枝蔚豹



癸丑樂府

思悲翁

少年尚智勇作事無狼狽魯連能射書周處善除害不  
 愛七尺軀妄圖萬里外崆峒劍可倚東海鯨可膾百年  
 何迅速萬慮難淘汰不成棄毛錐漸欲謀棺蓋歸來坐  
 甕牖氣味如蒿艾女贄既已長男禮行復大用張融語貧與  
 黔婁同累較向平最隣里轉相哀英雄何足賴

癸丑五言古詩

房衍公孝廉與予一見後朝夕不能相離在長安



得此友尤不易也因感贈三首

桃李花滿城無人看松柏高賢忽見之愛其長千尺坐  
卧不相離流連朝至夕紅塵汚蒼翠頗爲此樹惜奈別  
清冷泉難依巉巖石可弔亦可賀邂逅青雲客須知房  
次律房瑄爲永禪師後身不讓陶貞白

京雒何煌煌相府何潭潭飽馬鳴聲驕飢人心自慙性  
拙不識路動迷北與南君家慣出入門巷乃獨諳令兄

武庫司携歸遲每留宿永夜聞高談于我何所取無乃  
家居燕荷包涵不見橄欖子羞與棗爭甘回味豈不佳百吐或

一舍

風塵困公車江湖老舟楫相見苦不蚤我髻白難鑷結

交半海內逢君意最愜澹然名利場議論無枝葉三日  
不會面鞞驢來相接知我徒步艱又復上馬怯感君好  
意氣因之削筐篋薄技何足觀所期樹大業少陵師蘓  
李長吟求妥帖如何近世人徒然誇敏捷小心作者塗  
千載光同暉

徐州獨無戒石不知廢自何時五兄大宗到任之  
初亟覓工刻碑將朝夕見而自省焉蔚聞兄言喜  
其與古人行事有合也因援筆記之

州縣立戒石其來蓋已久宋室雖丘墟遺訓垂不朽不  
顧膏脂盡肯念俸祿厚下民誠易虐上蒼可欺否徐州  
久缺員石廢誰之咎或繇貪墨吏或經地震後吾兄甫



至州太息常在口謂此宜亟舉箴銘勝座右便欲立碑  
亭將以儆官守因憶王龜齡入夔詩可取當時修戒石  
太歲方在酉摩娑石上字瓌奇愛黃九命工設欄檻護  
持計不苟豈惟藉自省勸勉及僚友兄意與相符同是  
民父母清白遺遠滕頌聲流黔首天道苟不遠金章卽  
到手

施愚山曰古人之事古人之詩

燕子樓

有序

予嘗讀關盼盼和白樂天詩而傷之夫既守節至十  
年之久雖更二十三十年當無異也雖終身不死未  
害其爲節婦也觀其和詩之工必讀書達禮者其不  
與張僕射建封同死固白云恐彰好色之失耳燕子

樓題咏甚多未有及此者余故特爲表出

彭城我再到燕羽正差池經過燕子樓城上長蒿藜或  
言關盼盼雖死無乃遲白楊可作柱紅顏亦已衰君請  
聽我言於禮故有之不見魯文伯內人行哭時賢母語  
弔客此子與禮違不見楚昭王有蔡姬越姬蔡姬許以  
死越姬獨相非苟死成君過敢取後世譏盼盼讀此書  
定然喜得師待至十年後泉路亦易追愚生遭亂世所  
遇驚且悲紛紛偷生者反面無不爲道喪風俗壞運去  
人心移誰如張公妾肯死樂天詩

癸丑七言古詩

夢研歌爲汪季角舍人賦



汪舍人狂且迂夜夢亦與常人殊覺來猶自成歡呼但  
道世間尤物罕與俱同衾艷婦勝當壚欲問未問心躊  
躇或到巫山神女居不然所得明月珠研數云與巫峰  
符傾城一笑真腐儒曉起題詩信手書覺比江淹才有  
餘斲窗舍人事可吁陽滔豈堪作汝奴自述高門蕩若  
途直入廣廈無所虞四面列几一塵無寶研縱橫好形  
模漢廷馬肝質較粗魏家銅雀瓦不如不知誰氏居此  
與或卿或相士大夫終朝弄此相戲娛不暇包裹亟取  
諸懷歸但尋間道趨笑君夢中辨太疎富貴那得閒須  
臾肯蓄多石勞其軀我聞神仙不頑愚文人在天理非  
誣應是杜韓與陸蘓如今名字列清虛感君相賞手研

朱

季角近日酷嗜四家詩將合選成集行世

鍾嶸殷璠德不孤報以多研徒

區區願君千載享令譽

施思山曰此夢甚奇蛟門故當不凡

### 再題汪舍人十二研齋歌

曾登百尺梧桐閣復來十二研齋中梧合卷阿鳳凰至  
研與莊生蝴蝶同齋名好奇復近幻無乃以此警情慵  
答云志趣誠各別有如將冰語夏蟲樹蕙寧嫌百畝寬  
滋蘭寧嫌九畹豐使我坐擁金釵十二行何如此石一  
一走蛟龍尋思君言殊有理愧爲賓客嘆吾窮君苗一  
研尚須焚士衡何意許相從善舞固宜長袖女善賈斷  
屬多財翁舍人自此名更大尚方筆札下九重鬼神於  
汝真用意餘人妄想夢魂通我歸但掩柴扉卧起卽閒



挂看山筇及池竈煤無所用屢月但憑塵土封雖少才  
名共三益却免剝啄驚雙僮痴守蓬蒿亦不惡夢中誰  
要見周公故人文債方爲累聞此一笑悔忽忽

送王子重下第歸里

男兒意氣雄九州一生遭遇難預謀管子何曾病三走  
卞和亦得傳千秋才如王生竟不第益信鬼神擅權勢  
久識超宗有鳳毛尊公爲涓  
來太史莫學蘓秦嘆貂敝昨朝相

見告歸期愧無錢酒勞臨岐自笑奇窮如昌谷聊歌一  
解贈亞之

清明觀遊女作

百歲光陰如逝川清明花鳥又依然烏鴉銜肉或銜紙

海棠含雨復含煙香車寶馬紛如許處處賞花聞笑語  
無人愛看尸陀林使我長懷七賢女

任明府捉賊歌

滕縣東山十三寨招安諸賊蟠其內彎弓之徒使操表  
鷹雖化鳩眼猶在一賊藏身伍皂快狡猾頗得上官愛  
屬邑桃李豈易成荆棘被寵門墻壞強入人家奪人妻  
野雞豈是鴛鴦對書生計出賊意外上馬身輕箭滿袋  
率領獵徒當歲首狐兔擒來嫌細碎吏胥曾不知所爲  
此賊何繇施狡獪親入虎穴縛虎兒誘虎視兒離草萊  
執法請除百姓害上官聞之翻見怪看君能用臯陶刑  
塵中肯下安仁拜至今滕縣月明中無復當時舊犬吠



癸丑五言律詩

贈梁峒樵舍人

姓字兒曹熟

子諸子皆能熟誦峒樵闡卷

科名故國傳知君非一日

相見值衰年意氣真傾蓋壺觴那惜錢長貧亦堪訝瘦

馬繫門前

書生羞俗吏載筆正相宜

皇甫曾寄中書王舍人詩腰金載筆謁承明

官似

廣文冷才如天馬奇輕風鳩鵲殿細雨鳳凰池寒食又

將至舍人應有詩

先生耽麴蘖夙有晉人風痛飲仍燕市愁吟笑杜翁身

應從羽獵家莫憶空同

山在京平賦就聞

天子何愁酒盞

空

贈李聖年孝廉

時寓報國寺

文史東方朔賢良董仲舒徒然能射策只自困公車愁

坐老松下病眠紅杏初思歸歸易得羨爾有田廬

贈房興公樞部

匣裏豐城劍猶聞夜吐光郎官居武庫星宿並文昌他

日平津閣終朝北海觴雲霄知易致賓客日相望

宦向京師達交於老大真鳴珂重鄉里倒屣及親隣荆

樹三株盛苑駒萬里馴惟聞述先德腸斷鼎湖臣

接物名逾大為官道更通近知閒有咏因驗靜多功獨

宿嘆鶯燕中宵夢華嵩伴惟圖史好價重奈囊空

居官亦良苦幽事慮相妨未暇親茶竈何曾遠筆牀杯



添櫻筍候衾共弟兄行樂此輕朱紱無人識爾狂  
惟勤堪補拙得趣向誰陳愛爾無他嗜求爲有用身光  
陰同過客博奕任如神賭墅雖賢者應慙運甃人  
斗室真清絕繁華君所羞陳窰勝珠玉法物辨商周舊  
自豐城購新從廟市收更披金石錄思與古人遊  
無數長安客漁樵心自驚善交惟晏子舉世棄君平輕  
服同袍意蒙製紗袍見贈高齋下榻情淹留不覺久夜醉復朝  
醒

贈周星公光祿

娛親方愛日事主再朝天大隱金門裏長貧玉食前紫  
薇稱故物紅橘奉高年顏謝皆光祿詩名爾並傳

長安裘馬地古道似君稀薄俸每沽酒寒天曾解衣狂  
名吾自厭拙計衆相譏惟喜飄零日論文願不違

潘楚吟名其書屋曰停帆屬題

居與牽船異身應向世慵停帆真可賀戴笠許相從燕  
市人如海朱門馬似龍風波此中惡爾意獨從容

房衍公每以治生養生相勸因有贈

好奇兄與弟來往已多年與爾遲相見依人正自憐客  
愁消並榻生計勸求田老日饒鄉思從今益浩然  
學道自何日談玄真可聽出門尋羽士拭几展丹經應  
識金銀氣習觀龍虎形吾慙衰白甚亦漸惡葷腥

京師寓中閱劉貢父中山詩話有感



詩話石曼卿獨行京師一豪士世之而語曰公幸過  
 我家石許之同入委巷抵大第藻飾宏麗錦繡珠翠  
 殆非人間所擬歌舞歡醉馬書為揮籌筆驛詩數篇  
 以金帛數百千贈之復使騶從送還恍然不知其誰  
 翌日始無復省所居矣他日遇諸塗又遺以白金數  
 兩謂曰詩中意中流水遠愁外舊山青最為佳句  
 長貧棄鄉縣垂老入京城米價從來貴錢囊到處輕舊  
 山青入夢流水遠無聲豪士如今少誰憐石曼卿

贈滕縣任明府淑源

太瘦驚相見艱難為我言一河輪輓盡

時方督催河夫柳料

兩驛

往來煩潤澤定何似井田難再論古特見才地滕薛事  
 偏繁

傲性依然在狂歌摠不如朝炊連藥餌夜寢抱文書道  
 上芻茭滿堦前花木疎何繇聞 殿陛為爾意躊躇

儘有眉堪畫豈無琴可張到官翻敗意遣婦却還鄉天  
 上雙鳧影宵來列宿光後人增羨慕何用獨淒涼  
 昨效陶彭澤公然乞早歸上官齊勸慰父老最瞻依共  
 識宦情淡誰言公道非得名應不偶囊橐看人肥

癸丑七言律詩

慰會庭聞下第

崎嶇萬里頭將白憔悴青春杏正紅絕塞封侯曾未遂  
 高樓少婦久成空 庭聞近來遣妾學道誓不更娶 千篇自信詩無敵三  
 北誰言戰有功為問大羅天上客可知成佛讓英雄

彭城懷古追和潘蜀藻八詠

彭祖井

在城東門內相傳彭祖觀井而覆以輪即此



海堂續集 卷之五  
顛項玄孫久不在彭城遺井且閒臨當時已並龜蛇壽  
此地曾懷恐懼心綵女豈堪傳道術殷王誰肯聽朝箴  
先生到處如觀井回首人間殺氣深

附蜀藻詩

城邊古井覆春莎未必泉通濁水河却訝老彭偏躅  
踏直教年壽欲如何養生詎有神仙術遠害還緣恐  
懼多莫怪世人軀命促更從湖海狎風波

子房山

絕少雞聲過短墻惟看秋草滿山黃人心昔日全歸漢  
此地千秋尚祀張銷印非關忘五世散兵終不敵三章  
山即雞鳴山相傳  
子房散楚兵處可憐帝業須成就負却初心說項梁

子房曾說項梁請  
立韓公子或爲王

附蜀藻詩

雞鳴山下暮煙平此地曾聞散楚兵五世相韓身未  
許一生爲漢自分明袖椎已釋先人恨銷印應無故  
國情誰使羸王猶口實事仇翻託報仇名

放鶴亭

在雲龍山

山人昔日此躬耕元祐年間尚太平世上已傳經義說

時王介甫三經新義  
方行東坡謂之新說河邊未識鼓鼙聲孤僮慣上雲龍

卧病馬長隨野鶴行東坡過雲龍山人詩孤  
僮卧斜日病馬放秋艸江北雖然

梅樹少即看梨棗也怡情

附蜀藻詩



雲龍缺處補煙霞細認當年隱者家除却使君無伴  
侶蘓子瞻詩慣與先生為酒伴只憑放鶴作生涯聽殘清唳松陰  
杳舞罷玄裳月影斜底事不如林處士山前山後種  
梅花

### 黃樓

黃樓臨水勢崢嶸經始當年不日成慈父但哀窮赤子  
河神亦畏老書生孤忠直與王尊並遺愛翻看召伯輕  
却為居官徒自苦終朝只是想歸耕東坡過雲龍張山人詩吾生如寄耳歸計失不早又遊百步洪相地築亭種柳詩云劍關大道車方軌君自不去歸何難

### 附蜀藻詩

黃河河上有黃樓樓自崔嵬河自流豈是亭臺能鎮

壓祇緣威德足懷柔魚翻鱷浪回千里龍抱驪珠徙  
十洲不信請看今刺史三年霖雨護神州謂觀察李公漑材

### 戲馬臺

荒臺築自楚重瞳馳騁中原虎視同戰馬千金多異種  
將軍八載壓羣雄如何意氣銷垓下徒爾悲歌哭帳中  
亭長慇懃却相待開船咫尺是江東

施愚山曰重瞳故自英雄先生不肯抹倒

### 附蜀藻詩

楚王項籍渡河來叱咤長驅萬壑哀豈有沐猴真帝  
子祇將逐鹿假龍媒揮鞭自合千人廢失路偏無一  
騎回誰道漢家非馬上不曾見戲起高臺



亞父塚

七十老人奇計多鴻門無奈沛公何可憐亞父虛當國  
 爭及良禽早擇柯泉下莫驚身道路墳前曾是楚山河  
 猶勝義帝江中死終古悲風捲白波

施愚山曰亞父泉下恐亦難見義帝

附蜀藻詩

謀臣亡後霸圖空尚有穹碑茂草中龍氣既然成五  
 采鴻門何必怨重瞳三章無計除苛政十罪曾難效  
 小忠漫道一增猶未用良平智不與君同

泰興道中

路入延令竹木幽江潮曲折遶村流蕎花稻穗迎雙寺  
 白雪黃雲亂九秋自笑書生但餬口相逢農父欲低頭

幸無旱潦災隣邑不礙琴書訪舊遊

九日社集朱紉芳半舟

齋名

重陽天氣似花朝吹帽無風物色饒屋裏香傳元亮菊  
 門前水接大江潮歌呼自向深更慣口腹真從澤國驕  
 莫怪野人狂太劇百年哀樂鬢蕭蕭

坐朱紉芳半舟留題

兩面秋風池館涼一堆書畫米家航濟川身老才空擅  
 泛宅情深事易妨煙月每逢歌管處波瀾難到酒壚旁  
 坐中客在秦中住錯認蒹葭水一方

癸丑七言絕句

族侄斗槎登第喜而有作



看花未暇便趨庭得句何妨癡叔聽白首紛紛似張倬  
登科記當佛名經

爲人夙昔耻驕矜宴罷瓊林喜不勝族叔但饒莊子癖  
却如海上看鯤鵬

六月十九夜徐州署中與客同坐月下忽有白虹

見於月之西移時雨至而月明如故賦一絕志之

夜虹曾見紹興年老眼驚看客未眠欲向時人問災異  
梅溪當日亦茫然

### 愁蠍

徐州足蠍似秦中短夜無眠愁老翁家在江都別來久  
何時照壁見蜈蚣

州士有送茉莉花及桂樹者賞玩之餘因成小詩四  
首呈五兄大宗

### 茉莉

茉莉花疑抹利花古來栽種只山家自從時世人心變  
香味但蒙兒女誇

盆花特贈自州人名字梅溪辨未真王梅溪有覓沒利花詩又謝二道人

以抹利及東山蘭爲贈詩自注云抹利見佛經名義未  
究或云沒者無也謂聞此香者令人覺悟而好利之心  
沒故前作沒利此且喜對花無愧色兄爲廉吏弟長貧  
作抹利姑兩存之

### 桂樹

愛花非是使君貪古署蕭然類野菴笑謂此花來不遠  
徐州封壤接淮南



待得花開八月中  
逍遙堂即廣寒宮  
堂在州宅內  
山人只與  
桂無分歸去  
雞冠花正紅  
予于七月初歸廣陵

逍遙堂有懷

彭城太守氣如虹  
早退曾期兄弟同  
自謂形容勝黨錮

豈知名在黨人中  
東坡詩猶勝相逢不相識形容變盡語音存益用夏馥事

堂前松竹樹全無  
子繇詩風吹松竹雨淒淒  
入夜依然風雨俱  
頭白

自慙聞道晚  
暫來還去畧相符

早睡

垂老英雄道士旁  
烏啼人靜步空廊  
閒中轉覺愁無那

只被鐘聲催上牀  
施愚山曰余讀書每近三鼓急就枕恒謂更柝催人睡也

甲寅五言古詩

題圖詩十二首

甲寅孟春汪生伯先生七十初度先生行誼類前賢者親友繪圖以介壽蔚同吳賓賢製詩

劉殷授七子經史圖

教子樂有成  
經史為根本  
學復貴精專  
甫田費蔗藜  
長盛昔多男  
門庭最煌焜  
七業次第興  
北方稱才苑  
登堂何所聞  
誦聲清且婉  
丈人樂何如  
聽此加餐飯  
父子兄弟間  
品如蘭在畹  
寄謝浮薄人  
望廬可以返

王祐三槐圖

雷雨雖在天  
亦復在吾手  
善人如陽春  
生意一何厚  
晉公德最深  
彥卿曾知否  
彼冤幸已白  
吾退何足醜  
種樹



告樹神人與樹同壽其上百鳥巢其下三公走此意豈  
荒唐于公堪尚友三株亦異絕效靈無不有

虞玩之卻展圖

虞公所着屐歲月亦已悠矣斷接以芒儉德誰與儔新  
屐豈不好云非臣所求著簪與弊席曾可棄之不齊主  
善其對拜官聊汝酬宋末俗方做朝士尚風流散髻何  
爲者簪幘炫人眸臧否雖無恕請君勿相尤

陶侃運甓圖

士行能習勤孔明之流亞當其守廣州郡齋頗多暇運  
甓乃至百以此忙曉夜曰余聞古聖惜陰造有夏如何  
效優游竟以成風化吾力有用時未竭難自罷中原事

如此老莊焉足藉請看運甓人破賊石頭下

劉凝之散錢圖

劉生隱衡門好施曾無倦賢主慮其餒餉以錢十萬答  
書自稱僕頓首謝繾綣尋嘗輕此物喜色忽盈面歲饑  
民正貧充腸惟藜藿持此散市門豈不適吾願吾腹亦  
易飽吾用亦易周仍乘蒲策車且偕老妻遊

王烈感化鄉人圖

君子能化俗不必在朝廷彥方居鄉日功勝政與刑取  
布遺偷兒知恥云可矜此兒遂改行終以善人稱仁里  
信爲美無人詣訟廳曲直倘須質望慮心已平折獄推  
聖門片言嘆其能斯人若得位爭訟何絲與



范仲淹義庄圖

范公贍其族德澤垂無涯置田名義庄千畝一何多族人荷鋤出歸每及棲鴉固是勤力作亦以酬恩波年年好風雨先熟義庄禾老幼坐樹下相與頌且歌晏子爲齊相待炊數百家沾惠雖一時久遠當如何

郗成子反璧圖

意氣生杯酒患難無交親賢哉郗成子一觴成故人酒間受重寄徬徨夜達晨預知衛亂作難果及穀臣妻子荷分宅再拜長者諭他日語孤兒曰有故璧存仲尼不妄譽嘆其智且仁仁者可託財知幾其如神

楚丘先生說孟嘗君圖

尚父與方叔詩人稱其美老成實難得少壯焉足倚魯連嗤田文謂之不好士果然七十翁乃以老見鄙先生但一笑春秋誠高矣亦不能搏虎亦不能逐雉出詞當諸侯決疑定國是未知坐上客誰復能辦此

龐德公釋耕答荊州刺史圖

龐公齒與德諸葛所父事刑于無忌容偕老有高致刺史亦賢者田間能躬詣笑指膝下人豈得無所遺高林巢鴻鵠深淵戲龜鼉物亦識安危防彼罟與羅子孫守耒耜所遺豈不多刺史默然別海內正持戈

衛武公規箴圖

堯謂壽多辱曾被封人嗤聖人能修德夫何慮辱爲衛



武識此意耄日自作詩抑抑德之隅温温德之基旅賁與贄御其職益已卑赫然為君侯不敢棄箴規古來富貴場齡齒罕與齊大德者必壽斯言不我欺

萬石君家居圖

漢庭方重儒文多奈質少慎哉萬石君子孫無儼佻太后聞其名是時君已老少長齊拜官亦足榮壽考誰謂君無文動與古禮俱慶也守父訓入里必下車下車雖一節豈不勝相如相如過故鄉邦君負弩驅

亂中再入滕縣贈任明府

烽火靜已久謂可聞絃歌雨露私善地歲豐五穀嘉河決頻為災民力尚可嗟柳料費轉輸絡繹惟牛車邁亂

又如此驛遞何喧譁朝迎

式夕接御

明府

奔走百姓當奈何小心供差役各如勤其家勞民民不

怨得此亦足誇將軍過縣去不損道旁花

吳野人曰勝他人德政詩

多少 施愚山曰 賢將軍亦難得

壽周雪客母馮太孺人六十

夫子昔游宦二親居里中登山望白雲憂如狄梁公寄書與賢婦慎無忘曲從苟非婦之孝誰成臣之忠供養曾不怠聞者稱女宗只今頭已白奉祀禮必恭采蘋咏名南七誠著扶風竭誠既不忝受祿亦齊豐

不老誠不易不妬亦良難誰如鮑蘓妻答姒有正言所以表門閭宋公敬其賢阿母德如之五男舞堦前

母所生二



子雪客 不知誰所出但覺中心歡今朝齊進酒一一綵  
居長 衣鮮願母億千歲長受君恩寬

題三子聯句圖 有序

徐原一翰林與姜四溟文學集飲汪季用舍人愛園  
原一之門人高生亦與焉適善畫者禹生在席因命  
作是圖季用為記  
屬余題詩其後

姜子負才名揚馬謂可儔落落性寡合夜光難暗投翰  
林與舍人傾益最綢繆宴集偶聯句因復寫為圖侍立  
惟高生門墻亦勝流但能悅吾道何必預唱酬我詩題  
卷後援筆一長吁交道世久喪名譽非所謀文章如鴻  
毛勢利如山丘所以布衣人出門恒低頭若非蔣詡徑  
誰能來羊求

昔聞王秀之曾慕宗敬微寫像與已對所樂永相依李  
賀繡平原吾嘗笑其非同心實難得好客安足希徐君  
與姜汪况復生同時宴會偶然事公然付畫師趣與古  
人協像令後世思二君名最盛爵位亦不卑姜子在泥  
塗鬱鬱獨可悲請問河東賦吹噓當仗誰

題金太守長真小像

圖中桐樹三株上有白雲覆之  
主人據几而坐把筆如有所思

晝永池館清亭午桐陰厚中有盛名人據几科其首疑  
是韋蘓州宴坐焚香久意與雲俱遲援筆初在手題詩  
將寄誰新知或舊友

先生經世人豈獨工詩筆丹青如虎頭但能得其一汲



淮寧續集 卷之五  
黯在淮陽卧治事已畢馬援守隴西白事懶更詰大體  
雖足尚庶務亦未悉時危况不然軍需無停日於此心  
能閒信得弄丸術畫師良有意高才畧寫出簿書無填  
委文墨轉親密

甲寅七言古詩

壕有水歌爲任明府作

去年過滕縣但見城壕不見水今年過滕縣壕中有水  
深如此滕人爲我言壕水久乾蓋有以凡事辦公私公  
者易成私易毀城壕事雖公苟非其人誰料理貪吏苦  
畏人偶舉一事輒中止邑不得廉吏於今三十餘年矣  
境內多流泉二十七處分遠邇惟有五道泉引之可到

此壕裏水昔何繇塞直走運河失舊址漕運關軍需壕  
雖久涸憑涸耳水今何繇通賢侯清直政事美改泉先  
築壩無人敢道工可已繞城還入河運亦不阻城足恃  
復慮山水發壩遭衝決亦易圯易土却爲石開閘洩水  
永相倚一錢民不費日有俸錢吾可使盜賊見此水策  
馬臨壕愁溺死百姓見此水種柳栽荷釣魴鯉賢侯功  
旣成只今干戈紛道里有備可無患城邊那怕黃塵起  
聽此慰客懷作歌吾當呈知己實心行實政天下何事  
無終始富貴勿徒然功業無聞何足齒惜哉磊落人未  
免折腰長自恥

吳野人曰只將水道與治水委曲  
疏注而明府德政自見奇文奇文

送進旦菴俊之淮安



進生賣藥江都市高寄無慙古君子瓶中粟盡懶求人  
自信善人窮不死今來別我入淮安君豈往持韓侯竿  
欲答未答淚如雨江流戰血心膽寒城門未啓天欲曉  
家家送殯車聲早我有慈親喪未舉何以爲兒况將老  
許攷負土便成墳無田取土奈長貧所望脫驂師至聖  
豈無餽絹出仁人用東坡助李  
薦舉喪事與汝爲隣深可愧作詩  
勸助畢吾事汝所交游多孝賢愛親及人豈有異

爲冒青若題廢花朝圖 葉澹生畫

君家愛客日開樽况值花朝春色繁三吾亭與蘭亭比  
飲酒賦詩並難諉孝子今年謝賓客畫友明朝忽到門  
滿幅烟雲何慘淡久看使我傷心魂亦無杜鵑來樹杪

亦無慈烏啼耳根但覺樹欲靜時風不寧蕭蕭吹滿  
李園對此不須見孝子襟袖依稀淚有痕乃知因母忌  
辰花朝廢亦如蓼莪詩難存嗚呼此圖豈可少人誰無  
母忘母恩却嘆冒生猶多幸事母多年清且溫我昔失  
侍纔八齡祖母哀憐弱復偕與肉食之云有味慙愧程  
曾味吐吞復聞對帕聲哽咽張譏  
事亦或見扇涕潸潸張  
景  
胤諸賢都在孩提日萬古長看天眼昏君今儘有趨庭  
樂但當侍立花前聽笑言何況丈人頭已白遭逢亂世  
多煩冤我詩慎勿令聞之妻苦聲如三峽猿與畫同藏  
篋笥裏他年惟可示子孫

施愚山曰廢蓼莪後  
得此篇又添一故事

甲寅五言律詩



同楊吉公飲王天葉書齋兼觀圍棋次吉公韻

亂日欣萍聚豐年值麥秋故人才有用老我醉無憂餅  
似春盤薄鄉俗立春日喫薄餅謂之春餅情如夏木稠為貪鄉味美加  
倍憶林丘

手談稱坐隱玉子響楸枰易義吾能問梅詩誰擬呈琴  
書同得意勝負貴忘情老眼堪傷處長安事頗更杜詩聞道

長安似奕棋

王亦退入學有序

亦退弱冠即負才不羈及年三十有工詩善射之譽  
然落魄江湖久矣豪氣雄心一無所施始俛首取舉  
子業稍復溫習之便肯其衿詩以勉之

烏衣舊門巷白眼閱飄零綵筆輕干騎陰符伴六經

稱干祿客便上采芹亭方岳齋中學宮詩明朝有痴事須到采芹亭 佻達眼

中滿慎哉矜已青

楊吉公招同程穆倩鄧孝威林伯逸泛舟納涼分

韻得川字今字

去郭園皆好臨流暑即捐病餘貪俊味亂裏怪華筵風  
柳搖如筴晴荷香上船不須却悲慨煬帝舊山川  
上岸入花陰回船別竹林歡場陪故舊老態笑吾今狂  
省主賓禮樂知魚鳥心只言炎晝永不覺景西沉

席允叔招同程穆倩王九有李湯孫飲齋中

客為論文至飲同河朔豪一涼憑坐久三伏似秋高是日



適得驛站馳戎馬軍書插羽毛皇天真用意爛醉屬吾曹

中秋同桑楚執飲王天葉宜樓坐蕉下待月

招尋當令節况復有高樓風起蕉聲動雲開桂影流關山殊昔照甲馬亂今秋酪酏何須慮團圞未易求

甲寅七言律詩

陪任明府遊劉若木園林留飲花下即席賦贈

遊子未歸將欲歸名流相見可相依養親自有園中筭

若木尊人在坐留客長開樹下屏春色便同潘岳縣花香特撲

老萊衣聽鷓更對盈樽酒亂日惟憐此會稀

留別任明府

屢荷淹留日把杯多年膠漆擬陳雷窮途念我髮如雪

仕路看君心似灰戰馬愁聞城外過春花忍見別時開

海田閱歷真難料珍重當今濟世才

挽房發公文學

辛苦名場被折磨東坡詩惟有詩人被磨折修文地下事如何才華

誰不羨三虎年齒猶應高四科別後音書遲歲月生前

雲樹隔山河筭惟春艸軒前路不待招魂魂蚤過

手足吾曾患不仁客豐城曾得此疾煩君問訊久連晨擇醫想

觀倉公效饋藥因聞杜老貧客裏友朋同骨肉閒中感

佩雜悲辛誰知老病今猶活失却哀憐老病人

秋夜社集張與參宅同紀槩子黃仙裳范汝受余



來儀

羽檄連朝苦不停座中相對倍忘形華筵難向愁時見  
佳句何妨醉裏聽詞客風波同宦海老年兄弟似晨星  
近來意氣三韓盛我亦遼東舊管寧

與參遠東人

得徐松之汪晉賢書兼惠示雲山酬唱詩詩風初  
集賦此奉答

雨過江風送鯉魚剖魚未了意躊躇較之木李投何厚

想及隋珠報不如

張平子詩何以報之明月珠

四海壘虎同伯仲前

身皮陸重樵漁選詩懶效中州集應怕人看當史書

選例

不用小序不加評騭

九日汪叔定季用招飲見山樓同程穆倩姜西溟

徐原一

世短意多吾自悲二難瀟灑愛吟詩望衡對宇招尋慣

美景良辰酩酊宜家有高樓山最近年無閏月菊何遲

或言今年宜有閏月以節序驗之端陽無榴火重九無菊花則其說似也

笑聲亂落梧桐樹

忘記江頭羽檄馳

宗定九東原九日見東次韻

重陽節過雨初殘好友書來值午餐垂老多憂慵對鏡  
得詩狂喜似彈冠隣無白墮真堪詫世少王弘亦可嘆  
須識高天長用意美名成就賴酸寒

赴金長真太守宴賦謝

郡中孝廉文學同宴者十六人

自運家糧苦可知躬親馬草豈難爲

用陸佐公未至潯陽郡教中語

只



言杯似東坡小

東坡作太守時有詩云請君莫笑銀杯小爾來歲早東海窄

不道樽

同北海持筆墨事尋兵過後管絃聲驗歲豐時終朝未

減論文興高會還酬賀雨詞

郡士作踏莎行賀雨予亦有和作

### 五兄大宗重修彭祖樓有詩命和

故山雲母儘堪餐辛苦餘生也服官八百年高身未死

彭祖為殷大夫殷王遣綵女從受房中之術行之有效欲殺彭祖以絕其術彭祖覺而逃去時年七八百耳非

為死也見抱朴子兩三朝換意常酸彭城自古留仙蹟刺史登

樓望井欄新向樓頭懸扁額怕人錯認壽星看

扁額壽星看城弘開

### 附五兄大宗詩

先生昔亦是人臣跨歷商周歲月新豈獨養生能學

道誰如處亂竟全身構樓仍與井相望為政難忘仙

作隣從此愛看香火盛要令福壽及吾民

### 和五兄大宗重修燕子樓詩

經營豈獨愛斯民恩澤猶能及古人纔為樓成閒得意

復緣詩就暗傷神天清日暖梁棲燕雨虐風餐瓦似鱗

彈壓河山憑志節城垣雖固讓隣响

微禽那解伴多情歲歲雕梁相對鳴只為美人能盡節

却教燕子亦傳名張公豈料勝王謝白傅偏能管死生

異代登樓愁極目打毬場上草縱橫

施愚山曰余過徐州絕句有題詩白傅多情甚留得春風燕子樓又為香山解嘲

### 附五兄大宗詩



芳姿已似雨餘花燕子依然巢此家古瓦風吹易飄  
 落高樓日久奈欹斜城工幸畢軍興日勝蹟難忘節  
 度衙化俗無能長自愧惟將盼盼向人誇  
 翠袖曾蒙僕射憐高樓異代尚巍然多情鳥亦依貞  
 妓好事吾嘗笑樂天但守故衾長獨卧遲歸黃土亦  
 堪傳莫言命似殘花盡萬古知名是大年

放鶴亭和五兄大宗

表裏河山入畫圖却嫌奔走為儲須纔催戰馬過城去  
 也放仙禽對客呼歸計還如蘓軾晚家風曾見董生無  
東坡贈張山人詩比  
 之天隨子董邵南自從亭子新修後應有高人願與  
 俱

附五兄大宗詩

為愛山家景物殊雲龍高處一長吁思歸田里何絲  
 得久走風塵未免愚馬草堆塲煩檢點渡船編冊入  
 追呼幽人那易長相近放鶴亭前愧大蘓  
渡船以  
 渡過兵

子房山祠和五兄大宗

楚兵一夜散何方萬古岡陵屬子房刺史可能師進退  
 游人誰復感興亡封侯曾慕神仙侶祠宇合臨山水旁  
 只是范增墳咫尺魂來魂去忍相望

附五兄大宗詩

子房勲業重千秋瞻仰平生願偶酬此地誰知來薦  
 酒楚人何故也忘仇城東尚有高皇廟遺蹟兼傳異



姓侯自是古來公道事况看風景更銷憂

重修黃樓詩和五兄大宗

古蹟經過感慨生黃樓頽圯更堪驚當時豈為遊觀美  
此事須知力役輕無復霸王廳可拆東坡詩重墮遺蹟已塵埃惟有黃樓  
臨泗水自注云郡有廳事俗謂之霸王廳相傳不可坐僕拆之以蓋黃樓幸逢淮泗水俱平  
勞民最得民心處五穀豐收百室盈

附五兄大宗詩

賢守文章感至尊却操畚鍤領黥髡自逢眼底城三  
版不負胸中策萬言更建黃樓龍遠遁還携綠酒客  
微喧我因修葺增慙愧未有功勲答主恩  
甲寅七言絕句

五十五歲自題漑堂詩集

惹起虛名因綵筆粧成老物是霜髯餘年從此恐無

誰與石屏為二嚴

戴石屏祝二嚴詩我老歸故山殘年能幾許平生五百篇無人為之注零

落天地間未必是塵土再拜祝二嚴為我收拾取

呂尚

朝歌市上鼓刀夫虎變鷹揚絕世無寄語時人休老老  
須防妾倩笑君愚

示大孫舒

老知天意厚吾門詩道將憑詒厥尊他日若能進家集

得官應比許公孫

許渾孫因進家集得官見王元之小畜集

題禹生尚基自畫小像飲犢圖



曾持妙技走風塵每遇麀頭鼠目人路上原來褒鄂少  
歸家引鏡自傳神

戴笠朝朝向草萊山青水綠興悠哉與牛作伴身將隱  
却笑何充老秀才

東坡有贈寫真何充秀才詩

堆牀金璧餽從誰揮去偏臨飲犢池不自圖形丘壑裏  
如今真覺虎頭癡

題喬雲漸小像

丰度翛然迥軼倫幾時疎嬾到冠巾老夫乞食長奔走  
愧爾終朝趺坐人

乙卯四言詩

春木四章

汪舟次四十初度詩以相勉

春木將華日新月異今朝我友四十已至詩如陶公無  
聞是愧賀客盈堂誰知斯志

我初識君三十未及日月推遷忽焉四十陸生作歌雖

誇體力勲業難成念之悒悒

陸平原百年歌四十時體力克壯志方剛跨州越郡

還帝鄉出入承明擁大璫清酒樂炙奈樂何

四十始仕聞諸禮經如何我友長守柴荆退亦何辱進

亦何榮日有老親爵祿難輕

區區爵祿而翁不然翁昔辭賞曾慕魯連凡百事親養

志為先願崇明德以娛高年

乙卯樂府

新翻子夜歌



郎莫問儂家儂家千樹橘橘有渡淮時儂今伴郎宿  
 莫笑東家蝶今向西家飛願郎開醉眼看儂顏色稀  
 懷中有破鏡何日更重圓恐郎嗔念舊擲碎在郎前  
 郎性哮如虎佩刀復奈何知儂怯上馬教儂長着  
 籠中雙孔雀飲啄何自然儂歡願如此各得主人憐

後新翻子夜歌

哀難婦也

昔是宜男草今為思鄉棗棗意向西南不知東北好  
 臙脂有大罪顏色實誤儂感郎 儂歸不敢更為容  
 儂是宦家女郎亦宦家兒買絲繡孟德為 蔡文姬

施愚山曰千古無人道出

別郎雖一月身未出鄉關愁郎今夜夢遠上馬支山  
 儂身值幾錢鷹眼何太詐知郎不舍儂故故索高價

吳野人曰變鄭歸雅辭復古絕

乙卯五言古詩

題汪季用舍人三好圖

舍人有三好性類蕭彥瑜音律與書酒缺一不足娛因  
 命善畫者寫入行樂圖圖成先示我不棄老腐儒中有  
 五妖姬時枚摠不如一姬坐吹簫一姬調箏初一姬閒  
 按譜細看手爪殊二姬立近前行酒復較書主人方啣  
 杯醉面微有鬚盛年身強健安閒退食餘買書不論價  
 黃金到手虛几上所羅列富過於陶朱展翫此圖罷既



喜還躊躇所喜神情肖所慮歲月徂百年易至耳少壯  
乃須臾蕭公當暮景三事亦難俱人生貴自足何必擁  
羣妹請看楊直講惟一嬌小奴兩幅青布裙長飢縮其  
頭三脚木牀上調曲清且適此樂亦尋嘗梅翁家所無  
雖無何足傷富貴多庸愚美名天所吝庸福不可居高  
才如舍人落紙傳通都應接損精神車馬填其閭而况  
絲竹邊又自稱酒徒竊願方剛日預爲衰老謀斟酌三  
者間永保金石軀

題程休如小像

圖中巉巖峭壁  
上人獨行其側

丈人家黃山泉石舊相識思之不得見低頭平山側構  
園先求石愛其峭且特平生最透迤雲夢在胸臆所賞

惟巉削賢者真不測取人能推此豈肯棄孤直行止多  
閒趣衣冠亦古式誤擬列仙人爲有好顏色

談長益有錐鐵漢詩烈士暮年遇物不平故其言  
如此亦足悲也余乃代錐鐵漢作答詩

但聞匠者歌不聞鬼哭聲匠者誠小人遭侮竊不平只  
今道路間白骨紛縱橫問誰使之然凶器令人驚越王  
見吳沼趙卒入秦坑豈無刀與戈勝敗非鐵能區區安  
足恃謂可立功名金鐵若有知不願爲甲兵願蝕泉下  
土永使世無爭

附談詩

隣有錐鐵漢日夜苦不休汝歌自爲適吾恐鐵生愁



短勿製刀劍長不爲戈矛僅琢五寸釘釘人棺四周  
錐鐵鐵有聲其聲似不平終焉沉沒死不得錚錚鳴

勉兒輩學醫

相馬相牛者亦各立其身使兒無處所所愧非賢人

生曰者列傳子有處所可謂賢人讀書守章句有志常不伸吾已成自

誤忍復認子孫矧今亂靡定富貴安足云古聖隱卜醫

斯語可書紳審擇二者間惟醫術更仁出能活婦孺入

能壽雙親

中秋夜與同幕者把杯頃刻輒已散去獨坐書室

因念古人遭際不同有感于中詩以言懷遂多所

援引是夜復作家書與諸兒詩亦附示焉

我有同心人各在天一方川塗旣云阻歲月復已長尺

書久不來戎馬日倉皇茲焉逢令節何繇共舉觴新知

豈不衆誰可語行藏閱世成皓首愁看意氣塲叔牙怨

貪財鍾期辨宮商回念古人事舊交焉能忘

百歲如晨夕形膚非壯年旣老不行樂何以異蒙顛抑

鬱翻自今風流不及前學究非所恥句讀苦難捐虞仲

曾文身中清兼中權茲事良難齊將舌聊代田嫦娥方

高居妄希哀且憐何因化玉兔依桂永安眠

豫章古名郡徐蘓垂芳譽

孺子雲卿

亭圃悅過客勝蹟載於

書眼中非昔日干戈滿村墟明月照流離我爲涕漣如

豈惟哀郡民亦自悼微軀危亂不遑避骨肉久離居坐



深氣稍寒漏急夜欲徂美彼巢中鳥同類獨相俱  
頻歲看明月今秋乃獨明醉問月宮仙母乃時偶亨既  
無浮雲掩不受蝦蟆驚仙人不我答低頭淚縱橫局促  
如轅駒幾時萬里行閉置如新婦徒自誇娉婷天運誰  
獨泰師道古難輕馬融遇鄭玄王通得房生  
月雖照萃堂亦復照泥溝安得百年內有樂獨無憂况  
愁又無益視酒敢如仇但恨坐一室無人互獻酬索紙  
作家書將欲寄揚州書中何所道援引理頗優魯叟稱  
至誠其語萬古留蠻貊謂可行惟於言行求

乙卯雜言

九十翁歌贈汪觀瀾先生四首

九十翁曾却聘嚴君平翁所敬益州牧雖賢君平常高  
眠愛才如史相曾辭大學士史公諱可法聘翁不棄林泉身隱子乃  
顯任運惟樂天嚴君平業誰傳不入肆老無錢

施愚山曰音節古甚  
卽此可傳汪先生

九十翁心最樂榮啓期翁無作榮公披鹿裘飢寒非所  
憂翁家故自饒於世更何求况復膝下人才名播九州  
榮啓期未有兒雖自寬天何知

九十翁不阿意轅固生翁所企固生氣稜稜面責公孫  
弘翁亦教其兒曲學恥爲朋身雖老田野頗爲福所憑  
轅固生亦可矜擊筑時恐不勝

九十翁齒最牢笑張蒼不足豪張蒼多美婦飲乳如黃



口翁不近紅裙歲月亦已久語兒盤中物梨栗也須有  
如蒼者雖白首乳仍臭非吾友

吳野人日四詩轉折無窮波瀾莫測絕唱絕唱

乙卯七言律詩

病瘧

何時張王病根苗別夏逢秋勢正驕僕為離家常竊嘆

醫因敬老不須招

總督董公門下有宋迪公者名醫也

層冰纜苦深千丈

十日還愁並一朝忽憶奇人今古少卻衣師道

見東方神異經

重陽次劉超宗韻

酒徒何處問高陽佳節關門學退藏瘦並籠鸚日憔悴

老輪離菊晚幽香征人滿路難求醉殺氣橫秋易下霜

訓罷童蒙成一笑舌耕猶免賦空囊

輓丁彼雲

交游吾最愛龍眠老失知音只自憐共擬雪帆趨大府

忽驚雲馭向高天江流浩浩魂難至夜漏迢迢夢或牽

忍見及門書卷內丹黃手蹟尚依然

木落江寒訃到遲思君且復讀君詩門墻問訊田園計

幕府經營殯墓費自為生前長可敬若論身後莫相悲

武城亂信還如昨曾子而今摠不知

乙卯七言絕句

始買洲田作此自嘲

久識人間行路難買田垂老憇江干園中懶種閒花木



只愛劉家黑牡丹

唐末京師富人劉訓嘗要客賞花乃繫水牛累百于門客指之日此劉氏

黑牡丹也好事者引為談柄

題汪叔定小像

圖中獨坐梅花下看月

覓句閒尋入夜梅詩成獨坐意悠哉豈惟不預百人會

王維詩百人會中身不預

長怕酒人林下來

叔定靜者又惟不善飲

二十四橋橋上月法曹東閣閣前梅如今摠在愛園

園名

裏消受應須作賦才

示燕穀儀三子

半世高眠老自悲從來勤苦是男兒夙興待旦朱門有

衛武周公白屋誰

泊舟燕子磯夜夢沈姬

燕歷江程愛早眠鐘聲忽上曉來船心慙未有徐生

只夢姬人立鏡前

徐文長燕子磯觀音閣詩猶夢立閣中遙觀大魚翔

夢生於想想生因燕子磯邊淚滿巾從嫁書生長忍餓

至今將燕比腰身

采石懷古

采石江邊古有塋詩人醉死亦成名伯倫一輩吾難倣

老眼還思見太平

允文安得起論兵矯制行權事竟成武畧誰如劉太尉

猶言慙愧一書生

虞允文謁劉錡問疾錡執允文手曰朝廷養兵三十年大功乃出一儒生

我輩愧死矣

阻風望馬當山憶王勃事有作



江鷗飛去又飛還何意相看十日閒客本無心炫文采  
逆風憑起馬當山

六月舟過小孤山懷李珣躬親家

纔掛蒲帆午欲過舵工船尾唱吳歌海門第一關前客

宋高宗大書頌其

海門第一關

海門縣文學

老客看山忽惘然遠遊曾不避炎天思君正卧北窗下  
弟子憑喇邊孝先

舟中望廬山雲起

匡山對面氣溟濛欲上無因途正窮安得囊雲逢帝子  
便如弘景在山中

寧獻王每日令人往廬山之巔雲

以歸結小屋曰雲齋障以簾隕

瘧不止

纏綿一鬼太親人隔日相尋已數旬在昔何曾饒杜甫  
於今能不念殷均

閒將世事比沉疴聊把艱難訴病魔皮骨僅存肌肉盡  
可憐無地避催科

茶因寒胃碗全辭酒自離羣杯懶持只道杜詩能辟瘧  
苦遭愚鬼不知詩

枉覓醫家止瘧方人參須買覺空囊勤兵不及行仁義  
患盜應先用善良

病後林君貺惠人參兼以輕袍共我二絕奉謝

病卧朱門憶舊岑相過出袖有人參不愁再拜難如昨



準擬沉疴起自今  
黃菊開殘九月終  
枯桑似我獨知風  
輕裘與共前賢志  
不與尋嘗意氣同

感籠中孔雀

羽毛雖好命堪憎  
舊路千山樹萬層  
看爾徒然炫文采  
打圍時節不如鷹

見調鸚鵡者有作

隔窗鸚鵡閉雕籠  
少語多愁類病翁  
一輩優伶俱老大  
心情偏不減秦宮

李長吉秦宮詩禿襟小袖調鸚鵡

簡林君貺

軒窗最近興須乘  
風雨連牀事不能  
功過書成肯相示

君既有功過格冊于比畫之所為夜必書於其上

科頭宴起亦何曾

書齋雜詠

門下生徒未佩觿  
臯比絳帳摠難齊  
講章正待研朱點  
人報墻邊口又西

端坐終朝絕欠伸  
惟愁小子效因循  
多時未讀蘓黃集  
為伴程朱一輩人

寒宵坐久漏聲催  
把卷令人憶古來  
王儉幕中為上客  
馬融門下有英才

師生端坐理殘編  
火急軍書打鼓傳  
古老兵能語  
却來閒立小窗前

問予何術誨童蒙  
大匠從來規矩同  
麟趾鳳毛天所與



當時師傅敢居功

明農不早買山遲多病衰翁童子師此手長教親夏楚  
閒揮塵尾更何時

戲簡林君貺

執經人退覺身閒月下何曾數往還同看芙蓉依綠水

時同在幕中 獨携楊柳似香山

對燈花自嘲

燈花何事喜如斯辛苦浮生只自悲婆髻似霜頭似雪

高門聘作女宗師

示公子

導蒙彫朽用功多 元微之獻榮湯公詩勤  
勤彫朽木細細導蒙泉 朱戶光陰倍

易過公子也須行灑掃老夫長是愧西河

寄示諸兒

雞唱書聲一處聞垂髫公子太辛勤因思茅屋嬌兒滿  
睡覺牀頭曙色分

自嘲

只為童蒙力已疲如何更作帝王師太公泉下應相笑  
除却釣魚安可為

答童蒙問號

貧劇何妨稱學究病餘惟可薦臯盧童蒙若問先生號  
詩老書淫與酒徒 施愚山曰先  
生六字銜

冬至有悼



荔挺芸芳喜得春  
踐長迎福本茲辰  
衰年獨有驚心處  
進襪人今少一人

大兒婦李氏海門文學社修字岷躬  
之女也生時頗盡婦禮今歿已一年  
矣 崔浩女儀近古婦人常以冬至  
日進履襪于舅姑踐長至之義也

總督公衙中書屋漏甚蚤起雪滿牀几戲成一絕

屋如舟小瓦如蓬  
釣叟從來慣雪風  
只怪侯門深處坐

何曾準備敗天公

本草呼破笠為敗天公以  
天形如笠而冒地之表也

漑堂續集卷之六

焦獲孫枝蔚豹人著

丙辰四言古詩

寄誠諸子詩 十章

殷之王子師事甘盤  
白云廢學繇於屢遷  
矧予士庶頗累飢寒  
迫其暇矣敢即於安

日辱陽烏月辱蝦蟆  
佛亦忍辱桓如孔何  
矧在凡庸負慝實多  
橫逆之來請代切嗟

嗟予老矣道路靡寧  
匪遊是好惟懶是懲  
戒爾居家些竄偷生  
母若瓜瓠自起不能

相彼鳥矣穀不如雛  
雛亦匪智穀亦匪愚  
雛雖匪智食



能自謀穀雖匪愚維母之須

相彼襪雀

即鷓鴣善為巢巢至精密如刺襪然故名襪雀又名女匠

巢於葦苕制之

巧矣伊誰汝教維憺生拙惟拙與嘲鳥中斑鳩人中曹

交

綸既似綸

音關鹿角菜

組亦似組因形得名厥實則醜幸服

儒衣中何所有勿愧先民經文緯武

樹枸

音舉

隣園酒味斯薄種竹東墻笋穿西屋為竹為枸

慎爾圖度無俾爾隣增其寂寞

維弟事兄如父如師爾有穉弟愛之教之夏楚雖設慎

哉輕施盍觀慈母折筴行笞

次兒穀教童弟及姪過用夏楚之刑因作此示之老

人憐幼子情固然也

惟予生平實慙出處舍耒出疆長飢累汝求田自今庶

幾無悔亦既菑矣尚肯播否

田雖無幾仰齊顏淵稚子十齡恐類雍端

此誠第

歸與

歸與胡能弗遘苟從兒懶亦父有愆

丙辰樂府

君子行

曾聞君子儒西河有舊居文侯不敢臣干木亦其徒手

秋我何人八師彼丈夫尸佼羞相擬鬼谷不足俱

尸佼為商

君師鬼谷為蕪秦師

今來訓童子不同向舞雩日撻求其齊教刑

作自虞所講但今文此事足歛歛瑣屑將何成自傷口

卒瘞



丙辰五言古詩

人日示小子

歲月催老翁詩書伴童孺金勝同荆俗芝蘭愛謝樹二  
子入學堂七朝母輕度卯兮汝易忽素餐吾竊懼茲辰  
稱靈辰維以人之故五官豈不同千秋誰有譽今人愧  
爲人古人人所慕欲問古人誰鄭公好遭遇出門謁至  
尊上殿承寵顧吾師嘉管仲有味人也句太宗謂人日  
卿來真無負旣蒙天子獎便入史臣注此事亦偶然而  
足垂竹素人生貴自立讀書實先務一字變爲三傳寫  
多差誤進鴿被世嗤乃不如士庶朱門少俊才惜哉習  
純袴小子宜努力聲名須遠布勿只獻菜羹徒然敬師

傳

苦雨雜詩

陰昏兩月來淋漓無朝暮入夜更滂沱藩籬賴猶固紅  
桃損顏色黃鳥失平素惱殺冶春客今年成虛度閉門  
亦可樂骨肉幸一處戰血腥江湖羽檄飛道路不愁濕  
旌旗惟恐滑婦孺頗聞逃難人去家無回顧客縱忘流  
離忍復耽遊豫

農家亟春耕淚眼看龍戰南陂只數步欲往天又變班  
鳩鳴屋頭水怪行塲面心羨打魚翁蓑衣憑濤濺書生  
亦可哀太潤翻嗔硯老猶訓童蒙對枕無畱戀睡思如  
邊韶防嘲敢自便雷車軸縱堅胡乃不知倦誨人倘同



此尼父卽再見

塒雞棲於棟池魚遊上臺我聞豫章郡水患自古來孽

龍恐復出鐵樹花先開郡有鐵樹井相傳鐵以鎮孽龍

土人憂之曰陰氣盛自今前歲何處回黑雲覆千里雷

聲震九垓敝宅在揚州竊慮壞垣頽卽此成已私豈免

仁者哈但同懷居士難誇拯溺才

貧人夢金錢飢兒夢餅餌雨中不夢日吾亦怪吾意陰

晴有定理當知非幻異所以神與鬼中宵不我戲推此

恒淡漠雖遠終可致委運任自然頗聞古人事傳說版

築間弓旌非所冀呂尚釣磻溪竟展鷹揚志旣然在泥

塗蠟屐敢輕棄

### 愧爲舉業師

道旣不可輕禮必尊其師天子至庶人受教無參差所

怪倡優輩見師肅容儀尊所不當尊不自覺其非顧彼

諸弟子但學彈與吹技成雖絕世徒爲荒淫資陳國好

歌舞風刺見於詩巫風且不可况可身自爲玷及于祖

考奈何忘孝慈稽首向仇賊仇賊坐受之謂汝傳吾道

衣食將在茲恩與二人同受拜豈不宜我笑謂羣優幸

不遇仲尼誅戮免相及自尊乃不疑羣優答我言古道

久難追具曰予獨聖誰察雄與雌紛紛誦讀者視我無

高卑教人惟舉業授經豈如斯排比粗成篇記誦戒好

奇亦無揚雄字亦無司馬辭子弟遣從遊父兄多受欺



巧竊章句間事不異偷兒日夜所縱與青紫謂可期成  
就竟何如不過取輕肥等是衣食計何忍相訶譏聽罷  
低吾頭終身愧臯比

示小子

東向不見西文心雕龍東向而望不見西三隅苦多蔽古來喻大愚

今世乃常事小子聽翁言慎無忽瑣細畧舉舊所聞引

伸庶觸類同是一臯陶因呼別其義音遙則為人音桃

則為器考工記鞞人為臯陶音桃臯陶鼓之匡以木為之同是一俗華命名蓋

有二或縣或婦官豈不關古制呼霓作平聲便非沈約

意邾婁苟不辨懵然亦已至勸汝思誤書勸汝察訛字

勿效干祿人空疎欺主試說文與方言爾雅考工記凡

此數種書几上須常置

望隔墻冬青樹有懷吳賓賢

冬青隔墻看看罷增嘆息無人知懷抱但謂愛樹色松  
竹不在眼此樹復難即嘆息謂固宜聽之心益惻故人  
卧海濱守拙艱衣食本是歲寒交別來歲非一冬青覆  
墻頭舉首輒在側與子各一方為隣安可得

施愚山曰交情如許  
吳野人曰古音高調

寄汪舟次

好友如連枝離愁滿落葉久客胡不歸出城江有鰈再  
面非艱難萬緒頗稠疊自悼復相關流涕忽盈頰念昔  
我與子同自命豪俠鬼神一有權出處兩難愜韓愈困



二試記誦蓋涉獵君今何為者尚攻舉子業朱雲諸門  
徒不敢輕負笈我今何為者傳經代彈鋏天高不可問  
幽憂但相接變化亦多端復想莊生蝶且日讀南華聊  
當喚夢魘

問醫者宋廸公

整依鈴閣旁經看公子執齋如新婦車身似白駒繫廢  
詩常屢月有酒空千日况我非伯倫性不貪米汁逢君  
願有問將恐發狂疾

丙辰七言古詩

舞義盤行并序

古之喻舞態者或云翔鸞遊龍或云鴻歸鶴立畧足

盡之矣然手之所持率巾扇之屬耳故能矯纖腰而  
自如頓皓足而無礙且歌兒舞女所擅各殊未聞子  
都却能百戲雖號仙童但工六博而已丙辰八月既  
望侍宴於中丞董公之署中有二童子年可十四五  
善為舞義盤之戲晉代杯槃猶疑未巧羊家荆玉羞  
可同觀爰命登場以樂永夕二童則換蛾眉之妝效  
垂手之舞手中之盤繫以金鈴如雜珮然頭上之蓋  
立以銀燭如高髻然且復啣箸在口箸長出額初疑  
此箸何所用之既乃知其與所戴之蓋相擊也及其  
對舞坐卧回轉無所不可而盤如翻飛之蝶蓋如入  
定之僧遂使二器有動靜之異矣背後排立彈唱者



六人或挾琵琶或執笙簧以助鈴韻當其音節相應復使歌舞無彼此之分矣此誠劇場絕藝也是日在坐者聞中林君賦名峴曾龍眠劉超宗名鴻儀及予三人耳幕中舊有丁彼雲名倬者亦龍眠人曾賦此題長歌爲中丞公所賞何意今日之樂乃同山陽之笛相如逝矣但對鄒枚阮瑀不存轉憐吳質撫景愴懷誰能自己耶爰慨然有作非敢云能和丁生高唱也

二童侍立油幕間鬢髮雲中六博仙命着舞衣效嬋娟迴翔復似雙彩鸞乍進乍却何翩翩筭棊一身總不閒瓷盤在手盞在首盞內銀燈燦若蓮口啣曲箸箸仰天

與盞相擊聲清圓惟愁舉動成挂礙正爾陵危勢更安腰肢貼地轉如環手中頭上仍依然且看晉代舞杯槃誰誇唐妓戴長竿興盡悲來涕洟瀾消渴人今歸下泉對此如聞山陽笛多時不聽阮瑀絃

丙辰五言律詩

在豫章幕府求書不得而作

芸臺在何處欲往救空疎應少一官分長思四庫書彥深爲抄錄趙彥深抄書無誤慰祖作鄰居假貸誰無吝猶能較

魯魚

聞道廬山下曾藏李氏書斯人今不見僧舍復何如馬爲增兵貴兒因避亂愚不知生此世誰得帶經鋤



得家書說還債未了

家書來歲暮未拆淚先垂裁褐報初就寄金嫌太遲臘  
催春又至病與老相期自笑如張籍曾無債盡時姚合贈張籍詩多見愁連曉稀聞債盡時

丙辰七言律詩

春日齋中

從遭喪亂別西秦久恥逢迎一任真高興每思遊五嶽  
酣呼常是惱比隣嵇康潦倒麤疎性李白欽寄歷落人  
今日重教尋訓詁何時還我自繇身

述夢

平生未識寶文閣夜夢偶同劉器之身坐胡牀忽輕舉

俯看奔走笑羣兒難如紫綺騎鯨客亦異黃冠化鶴時  
喜劇欲狂緣底事不愁歸路到家遲

丙辰七言絕句

總督董公署中送劉超宗歸桐城

欲附歸舟計每窮明朝相送讓春風知君最愛忘機者

應見江鷗憶老翁

施愚山曰見江鷗憶老翁亦是前人所無

雅量虛懷總可思纔聞欲去淚交頤詩家倍是相親愛  
不為他鄉更別離

拍天春水一帆輕咫尺家山只數程回首翻憐授經地  
江城殺氣似長城

飽嘗意多違歸買江魚問釣磯縱使真同馬融帳



自然不及老萊衣

親故相尋日幾廻懸知尊酒定常開無勞更寫青山賣  
新別青油幕下來

病愈贈醫者朱廸公

因循瘧鬼久相妨病退教書聲漸揚却愧為師少功效  
不如靈藥釋昏狂

閒即頻過卧榻前自言學術愛前賢平生獨得黃公訣

寢膳常居藥物先

文中子謂北山黃公善醫先寢膳而後鍼藥

藥雖非酒亦常賒吾道艱難付嘆嗟看汝慇懃知有意  
憐貧敬老愛詩家

肯念江淹才盡時休嗔相謝贈詩遲寄書昨歲揚州去

說與兒孫已共知

一藝超然嘆絕羣書生頭白愧無聞何時始草陳琳檄  
醫得頭風却賽君

看君瘦骨似仙禽珠樹何年返故林應檢當歸長下淚

知看益母更驚心

廸公因遭患難遂羈留幕府

長使鍾儀拘異國徒然扁鵲想前身烏頭馬角應難料  
天道從來福善人

馬廐旁邊屋作隣何妨厮養也相親低頭幕府尊嚴地  
種杏安能許外人

得家書

遠道書來每勸餐誰知對案正長嘆頃增痰疾如元九



那有裴公送橘丸

宋太祖

武成遺廟並文宣兩廡寧須十哲全但為殺降嗔白起  
何知篡逆罪滔天

為江辰六闈題長安借書圖

圖中驢背馱書童子五人或抱書或抱酒甌

日日羣公許借書全忘五度困公車長安米貴君無慮  
芻豆關心到蹇驢

擊筑高歌人已無攤書把酒儘堪娛即看侍立都清絕  
李賀巴童穎士奴

丁巳五言古詩

塵鏡詞 有序

總督公因長公子歿後倍憐愛諸男光祚隆祚兩小  
子入宅已三月上學之期杳爾無聞惜前功之將廢  
也因作此示之

銅質美惡殊刮磨總難誤美者出秦宮或從廣陵鑄及  
沉古井中光彩何絲露常銅木難棄况復好遭遇繡帶  
為提携錦囊煩包護良工偶到門請試磨拂具初如開  
混沌欲放星月路繼如淘汚溝泥沙亦漸去主人蒙一  
笑贈錢養婦孺受之無赧顏恃有微勞故如何數月來  
塵埃任堆聚懶將寶匣收誰借玉臺助前時負局人進  
退心猶豫既自惜前功還復增後慮



寄吳賓賢

歲歲素心稀日日朱顏毀會客尚嫌疎况隔千餘里佳  
作看無絲好音亦寂爾寂爾自何時兩見楊花起豫章  
饒賈客未曾絕行李端坐自躊躇不覺淚如水求田問  
舍心應爲高人鄙學稼誠小人謀食非得已君貧如延  
之誰繼王公子以顏延年室甚甚陋故取以此陋軒勸君當治生復恐輕  
啓齒在陳有絃歌先師曾不死雖似幸免寒日暖陋軒  
裏

雙節婦詩

有序

太學生江九臯歛人蚤死遺孤尚在襁褓妻程氏年  
二十六能撫其孤湘至於成立九臯有從子名澂亦

蚤死妻汪氏年二十七有遺腹既產而不育以伯氏  
子爲後與叔母程氏相依且相勗也今程年五十有  
五汪四十有六湘來徵詩余既慨慕二婦之賢月有  
感於君臣之際焉援筆成篇兼告搢紳士使無忘卽  
義云爾

婦道比臣道此語昔所聞既當全志節更欲樹功勲撫  
孤須成立徒烈何足云寧難勿爲易譬如報故君嬰曰  
不多得况彼釵與裙列郡或一遇當世罕其羣不謂雙  
節婦矯矯在一門歛邑敦禮教江氏重婚姻刑于固無  
忝柏舟可同論至今程與汪苦節如一身叔姪在地下  
相見長歡欣曰各有賢婦曰各有後人既效共姜義復



擇孟母隣爲婦能如此請以勸爲臣

汪舟次赴贛榆教諭任去後數日余始自南昌歸  
抵江都不及祖餞悵然無已因賦寄懷四章

兩年羈幕府三益勞夢魂歡喜登歸舟踴躍入城門謂  
可對瓊枝日與倒金樽我歸君已行不得共笑言雖嗟  
同心遠所喜吾道尊三鱸頗足賀抱關勿同論

學官繇延聘事曾聞元季當時司鐸者往往居大位翰  
林李繼本且親賈楚事逮乎洪武初邑宰得招致全公

希賢與丘公克莊風流亦相繼李繼本丘克莊事俱詳見錢牧齋列朝詩集學徒

來四方光及郡縣志我友負奇才三賢乃行葦鳳池與  
烏臺旦夕謂可至如何年四十一官纔小試聘舉人不

行贊郎翻無愧高人多下僚因君發長唱

吳楚雖名邦孔轍曾不入遺蹟在夾谷君無嫌小邑尼  
山况接壤何難變士習近聞斥鹵鄉子弟寡成立夏翟  
羽不如文藻非所急贛榆隸今淮安禹貢海岱淮徐羽畎夏翟古禮廢已久

射圃牛羊集况復遭亂離舊經誰暇執文事與武備煩  
君重收拾瓠葉亦可烹講舍亦易葺勿爲客無禮徒然  
增嗚咽

古來工詩人頗得山川助此邑雖荒僻日照接連處與

州日照接壤 日夕坐城樓晴霞明海樹引領鬱洲山遙指蓬

萊路是時詩興發生徒誰可語下筆應自笑勢比海潮  
怒廣文官雖冷吟哦日無誤不知對景餘曾有懷人句



觀察金長真以丁巳八月十三日祀歐陽子於平

山堂招客賦詩予亦與焉詩限體不拘韻同程穆

皇盛珍示鄧孝威方邵村徐原一宗鶴問華龍眉許師六黃仙裳汪叔定季用李倚江王翰臣劉彥度趙聲伯家無言賓主共十九人

古人既已往接踵賴後賢子輿訓尚友子長願執鞭歐  
公守此郡惠政到今傳當時宴飲處遺蹟留平山平生  
勤爲文吾徒費仰鑽如稷勤於農冥勤於水官干戈尚  
滿眼文教廢多年山堂久已毀祀典誰相關當途實不  
遑書生徒慨然繼起惟金公辦香何其虔構堂復築樓  
木主設中間思齊誠無怠化俗亦有權重來攝鹽政俎  
豆最拳拳日聞古名臣英靈長在天雖當人代換魂魄

戀山川勝友况雲集文詞總翩翩迎神神所喜曠世成  
周旋祀畢還觴客令名各勉旃

丁巳七言古詩

汪季用舍人與心兄叔定招同程穆倩鄧孝威宗  
鶴問陶季深萃龍眉范汝受王仔園家無言汎舟  
至平山堂登真賞樓樓有毆陽公木主與諸子展  
拜既畢乃飲酒堂上各賦七言古詩一首時予初  
歸自豫章幕中登覽唱和之樂二年來所未有也

去作豫章老學究堂甫落成樓未構歸逢內閣賢舍人

云樓可登井可漱井爲第五泉新設亭於上折簡忙邀十日前着

展緩當一雨後荷花將放荷葉焦如夏豈妓乏長袖對



此使我感災傷亂世蛟龍習戰鬪高處忽令懷抱寬隔  
江山色青如舊古人亦賴文章力盛名不隔往來宙煬  
帝何曾有宮殿毆公儼若在左右至今真賞迹仍留坐  
久何勞笙歌侑諸君努力爭千秋如歐繼韓爲時教授  
徒自笑如劉昆但烹瓠葉充俎豆

金驛憲去郡三年復來攝兩淮鹽運道事和汪叔

定竹馬歌奉贈

郭伋治行何其優當時遺愛在并州及其再到名益顯  
兒童奔走如有求竊因此事發狂言曾令聞者笑不休  
兒童豈不勝父老迎郭似覺勝送劉後世父老修故事  
往往欲推翻挽留惟此不識不知者欲號卽號謳卽謳

樂易寬和如父母然後懷中亦可投誰其繼者惟金公

爲政簡易惠愛周兵戈始起甲寅歲紛紛駭竄如火牛

爭門但用田單籠

田單宗人以  
跌籠爭門出

訛言欲登王鳳舟

爾時  
避亂

考如避  
大水

公笑謂民何爲者縱爾出入爾無愁潛辦芻糗

供兵馬久之歌吹聞江樓只言黃霸堪爲第何意羊祜  
乃其儔門卒曾蒙延壽召王生願從龔遂游蔚也迂拙  
無足道亦荷提携兼綢繆去郡到今歲未久但聞驛遞  
頌聲流舊治重因視蹉來誰先拍手爭叩頭兒童鼓舞  
見真性竹馬清絕擁鳴騶微聞吏胥詰兒童公今國家  
之鄴侯汝曹非商復非竈且牧黃犢卧田疇

丁巳七言律詩



久不得徐州五兄大宗書

怯對青銅髮滿梳喜憑宵夢入淮徐蛟龍為患今何似

徐舊多水患鴻鴈同歸各不如大宗久有歸田之興今又偃蹇此州兩年矣衰白

光陰偏迅速亂離音信太稀疏黃河便在州門外難道

中無尺半魚

題凌蔚侯有懷草堂四首另有記見文集

無求錄事草堂貲尚復驚心小宛詩不為江關殊故國

但傷風木異前時孝烏棲樹情相感慈竹當階手自移

從此關門勤誦讀休經謝墅學圍棋草堂在橋野其地為謝公七聖之一

千頭橘樹費經營長憶先人似李衡魚稻鄉中親戚飽

蔚侯為於親戚嘗分田給之茶圃社裏友朋清蘭社見惟逢春露

秋霜節懶共田翁釣叟行祇覺卜商哀未散彈琴猶自

不成聲

良田廣宅願初諧豈獨花時景物佳熟看羣鷗門以外

閒裁小柳水之涯才華到處名流重鄧孝威詩觀初集曾青藜過日集於

蔚侯詩極其嘆賞俠氣中宵劍客諧絕愛湖村魚豕賤何愁有

酒却無腴無腴見南史

地僻從來足寤歌此中曾不羨槃阿幽人別業竹梧滿

世良朋沮溺多湖裏蛟龍欺不得大水頻年災及村人草堂獨得無恙

梁間燕雀喜如何問君更置高樓否三十乘書藏得麼

丁巳五言絕句



猛虎爲獵士所斃明日復搜穴得其子歸獻總督  
公公命養之籠中大纜如猫日思乳而號予有感  
焉

何人曾入穴得此小於菟猶勝孔融死巢中完卵無  
剪燭花有感

年覺爲儒老春從閉戶闌燭花休剪去又少一花看  
詠燈油

相藉還相苦吾憐火與膏本來求潤澤翻使受煎熬  
丁巳七言絕句

新買得狐裘忽自念五十八歲人着此復得幾年

不覺楚然

買得狐裘風雪天偶思齊相轉凄然前途看去黑如漆  
縱活那能三十年

題金正夏小像

圖中跌坐泉石之旁  
榻管將書視墨頗濃

濁世幾人似公子趨庭纔罷意悠哉僱人答策紛紛者  
誰讀顏公家訓來

跌坐看君思最清閒操不聿費經營多應得句如休璉  
或是裁書答士衡

徐原一昆弟四人小像合圖一卷索題

棠棣並爲天下士用東坡句勝流誰不想丰神樽前幸識姜

肱面肱兄弟四人畫裏還逢共被人



富貴場中取樂殊獨多高趣類潛夫玉昆金友人間少  
玩好無非博古圖手各有持皆博古圖中物

自豫章歸後得汪季用絕句八首次韻奉酬

偶去爲師有若無尋章摘句怪門徒序文也愛滕王閣

總督董公一日於大醉後對客誦滕王閣序及正氣歌不差一字自云童日最愛讀此二篇歷三十年未嘗溫習終不遺忘先生教諸兒記誦不可不以老夫爲法殺氣偏愁彭蠡湖

談笑今爲却病方何殊破賊手偏強尊前况復聞佳句  
味似連珠許飽嘗

歸逢佳節試龍船誤把騷魂比餓鳶賢婦應能作菰黍  
可人何必問蒼玄

幾客能煩倒屣迎朱簾人最善調羹老來難忘杯寬處

自喜心如鏡子明

杜老詩中愁太多文姬拍裏憤如何但存孟德憐才意  
也抵將金馬上馱

亂餘仍此對江天細話憂愁夜月前不向  
誰知顏色 金錢 山下過

往日酣呼達四隣今來相對素冠巾百年始覺歡娛少  
我是羈人爾棘人

文債停催事稍閒季用自讀禮以來久不爲文歸人轉覺有愁顏無

金可入劉义手况敢思量到買山

次韻答鄧孝威

熨眼看書知有無因君起舞類狂徒東坡喜劉景文至詩尺書真是髯手



迹起坐爨眼知有無余自幕府  
歸來恰值鄧孝威自海陵至  
亂餘握手非容易詩興

况堪吞五湖黃魯直詩公如大國楚吞五湖三江

有負懸弧射四方依人但願主人強歸逢鄧禹賢苗裔

羞說艱難已備嘗

君網珊瑚上海船孝威詩觀二集又將刻成矣我惟儲肉似寒鳶東坡

詩東鳶儲肉巧謀身因看載酒填門戶益覺談經讓草玄

舊友相過省送迎休嫌粟飯與藜羹尋花問柳無多事

落落晨星幾箇明

能文稚子太平多每憶將軍昔姓何廬山舊是藏書地

滿路軍裝載駱駝

烽火回頭尚徹天須將現在鬪尊前况聞紙價今如洛

省為碑文去索錢

非關苦憶舊鄉鄰曾被綸巾笑幅巾笑謂此翁誰可比

東坡三事不如人

輸君忙處亦長閒詩品能教謝勝顏痛飲狂歌仍不減

藏書豈獨愛名山

汪季舟避暑平山堂之真賞樓次宗鶴問韻奉寄

求閒果否得長閒亦欲求閒懶上山免擬程詩嘲熟客

會無庾賦動江關自慚不如季舟兼古人之長却得閒散過夏不知城市之異山林也

百尺梧桐閣上人宵看月色一般新哲兄謂叔定書報山

中第洗罷高梧亦少塵

縱不能詩不恨曾文章經術有師承若論爬癢麻姑爪



豈獨昌黎與少陵

季角携杜韓蘓陸四家集於山中方事評選

賓客尋嘗滿四筵暑中曾廢午時眠如今坐到泉香處

茶學盧仝每自煎

樓上久停京兆手鏡中看慣夕陽山惟愁此路蓮歌女

勾引詩思不放閒

愛向前賢行處行不因消夏費經營只道儒門長冷淡

誰知吾道有干城

平山堂舊址久為寺僧侵奪議興復自季角始

戊午五言古詩

藝圃十二詠

有序

姜貞毅如農先生流寓江南得吳中文文肅公別業

將以老圃終焉因名之曰藝圃今其仲子學在居之

汪民部茗文為作藝圃記繼以短詠十二章其詞

然盛矣予以戊午五月客吳門與學在晨夕過從酒

間屬予和作勉如其數景物之外不自知感慨之何

從也

南村

村路無人識云在此園中時聞布穀叫桑柘來遠風但

能友沮溺何必築牛宮

鶴柴

月出熠瑤琴風聲下松樹忽有仙人驥來學道士步戲

舞在廣除芝田非所慕

紅鷺館



房相西亭前景物頗相似當時憂國人開顏偶對此每  
同鶴陣看誰論筆意美黃山谷詩宛頸相連筆意多卑雅鶯善旋轉其頸古之學書者法以運腕

### 乳魚亭

洲島聚一池魚作千里視築亭俯臨之無人知樂意荷  
風四面來正看魚子戲

### 香草居

坐此讀騷經羣卉香如昨小徑聊自娛深情正有託不  
求園客妻廣記園客植五色香草恥造芸暉閣

### 朝爽閣

諸山遶城郭指點臨高臺旭日炤蒼翠風隨爽氣來

看枝上鵲飛去復飛回

### 浴鷗池

沼綠似春酒鷗白於冬雪主人非海翁愿性自相悅最謹愿曬翅朝陽邊和風亦不缺

### 度香橋

小橋楊柳邊曾不通舟楫蟾光滿三五幽人嘗獨立乍  
度水芝香忽疑荀令入

### 響月廊

園景夜更佳月炤修廊下最憐梧與竹聲影俱瀟灑高  
歌明月前不少同心者

### 垂雲峰



峰有干霄勢久與太湖別挺然窓戶前玉笋森羅列當時洞口雲相尋曾不絕

### 六松軒

滄海一揚塵徂徠惟遠望開軒面六松頗勝陶元亮陶云撫孤松而盤桓不遇歲寒時誰識風姿壯

### 繡佛閣

龐蘊家中人愛向閣中住惟以種種香而焚繡佛處鸚鵡不曾教能誦金剛句

施尙白少叅招同鄧孝威毛大可汪舟次飲寓齋

### 賦謝

音息曠已久會面復臨觴年齒在桑榆此樂寧易常京

洛多宴會但見車騎忙賓客滿華筵形骸誰相忘何如同心人話舊燈燭旁論文趣自佳焚枯味亦長豐膳復可驚旅食恐須防天馬合從東橙橘凋北方自知非貢禹不敢慕王陽日夜苦思歸偃臥舊草堂聚日無幾何且慰飢渴勝縱同弦與箏已勝參與商

### 贈趙考功玉峰

憶昔逢君時塵中並馬首意氣但相親縞紵會何有一笑雖須臾自賀吾得友貽書未及報旋歸看隋柳豈知項斯詩常在楊公口

別久會良難室遠人忽邇聞君入試院引領惟一水白屋荷相存美莊非所喜示我棘闈作獨宗文選體何事



歐與梅賦詩招謗毀

壯心灰已久耽弄惟篇章雕蟲誠小技覆醬亦可傷縱  
免廁中投何取枕中藏仇愛雖懸絕均之失所望慨焉  
謀梨棗感君亦空囊

長安米方貴旅食費經營豈無公孫閣欲往還自驚守  
拙吾難改求飽人所輕赤手竟無慮緇衣一何誠幸分  
仁祖粟不羨五侯鯖

送黃俞邵奔太孺人喪歸金陵

君來曾幾日君歸亦已遲遙遙三千里駑馬到何時報  
主悞承顏自古多有之看君兩俱乖誰不爲涕洟 詔  
下徵賢良傳洽亦勞資未聞游與夏反勝曾參爲陳情

拒不納竊懼非所宜俾君有此恨倘於孝治虧布衣如

李顥荷 恩實弘慈顥但以疾告哀憐尙至斯豈肯同

霸王竟焚介之推奉行在敦迫咎當歸有司我亦蓬蒿

人霜雪上兩眉 賜廩異養老稽首增忸怩字非干祿

書調姝應制詩逸民與儒林合傳母乃奇因君忽自述

萬一 至尊知春當返江都相尋或有期祖道一杯酒

今日難勸持淡淡西日落獵獵北風吹止哀勉粥食大

事當仗誰

送王子側歸新城

與君相別來中間歷幾閏金焦留咏處風帆吾屢進所  
思未易逢墨蹟猶能認賦詩曾不多冷然有遠韻此事



屬君家上媿維與縉昨復題藝圃風流傳吳郡在遠若  
同堂咫尺如千仞君知嵇性懶我愛鷹門峻東歸聞有  
期綵衣急省覲我亦厭京塵將欲尋田峻倘念蒲姿衰  
幸無魚書吝

送陳六謙任安邑丞

識面無幾日告別北風前交情與離情新舊不相懸凡  
是吾益友子皆與周旋背面何所云稱子今大賢所以  
聞上馬愁看鐙與鞭或訝子爲丞才如萬斛船今行一  
港中自視爲長川意雖愛子深於道恐不然古人卑教  
授謂無及物權相勸居此職親民在所先見朱子語錄韓愈  
記廳壁履道譏其偏慎無效斯立日哦二松邊葡萄酒

雖美聞之勿流涎瘡痍正可憫風流安足傳雙陸無伏  
勢仕宦亦有焉用唐宋安恭語安恭爲龍門丞數年而登列岳每以此語勸人惠愛兼  
清白拭目望高遷

贈李湘北學士

國門身再入齒稀髮更疎老鶴使乘軒心知理所無但  
喜蓬萊閣仙伯舊相於別來今七載重得上堦除况看  
坐上人作賦敵相如謂毛大可姓或似張安世記誦到亡書  
謂李子德因篤竊願比黃憲著作讓羣儒野性復劇懶何意蒙  
吹噓海嶽衆所歸諒難執一隅

西山有佳致去城惟咫尺仁智實難觀山水誰有癖豈  
謂鸞坡人屢尋鷲嶺迹氣味王摩詰襟懷謝安石示我



登臨作佳絕非一格獅象力最雄鐘魚聲不迫及讀廢  
陵篇轉令情不適信哉詩中史杜老如同席試問丘壑  
中誰是文章伯

鄴侯三萬軸公擇九千卷家風紹前賢籙金非所羨  
子甫髫齡文場雄一戰告捷八月中桂香方滿院傳經  
情既遂藏書功亦見賓客正喧譁君恩更繾綣內醞  
出黃封賜墨來金殿

壽李書雲都諫

阿閣巨中天其上巢鳳凰飽食惟琅玕亮音聞高岡縱  
水與早一鳴變禎祥俯視立仗馬塞默南衙旁日飮三  
品芻何補於朝堂我願九苞羽享年千歲長

古來批勅手曾是宰相噐一姓多傳人三台真易至草

野本無知諫藁蒙相示頗慕韓公賢韓忠獻公有似勝  
諫垣存藁

田錫事今日歌南山賓客工文字先生惟一笑誰識平

生志萬民登壽域四方皆福地然後懷抱開蓬萊任遊

戲

戊午七言古詩

題凌蔚侯小像

凌生年富身多肉而其奇氣難羈束謝公墅有讀書屋  
艾陵湖水映修竹有田可以代薄祿幽居且喜無剝啄  
牙籤滿架意不足貪如得隴還望蜀圖中書卷在  
几竹梧滿窓浩然  
遺像留人間雪中眉皺肩聳山不達畢竟繇清寒詩能



瘦人豈其然看君下筆有奇思肥而寡髯待擬誰努力  
無慚韓退之文章追琢兼聲詩

筆談世人畫韓退之小面美髯乃江南韓熙載

耳熙載謚文靖亦謂之韓文公因此謬為退之退之肥而寡髯後世不復辨也

吳蘭次罷官後重過江都值予將北上為作此歌  
昔送先生出守時何人不羨朱轡好先生相見潤州城  
日尋戴公與米老題詩洞口懶言歸來迎吏役增煩惱  
幾日先生竟罷官何人不惜歸來早先生卜宅愛吳門  
梁鴻為兄孟光嫂却笑行吟澤畔人如何自使頽枯稿  
已覺鴻文並徐庾更讀新吟勝郊島天公憤憤亦何為  
但能奪人溫與飽不能奪我文章印及我青山與綠沼  
先生且約舊酒徒麴蘖之事亦易了但恨虛名轉悞余

遠志惟愁呼小草坐間何可無車公減君歡趣恐稍稍

讀夢愚堂記長歌贈施尚白使君

十五年中三見面示我高文復數卷始識愚山號所繇  
不比愚溪苦悲惋道人未必即愚公持刺偶然來夜半  
先生自認是前身心無所感夢不亂內典何曾肯入目  
作記母乃近荒誕曰此不然吾有說因馬因車繇一念  
占夢之官載周禮官名久廢亦堪嘆佛說不盡異吾儒  
何況再生非罕見東坡曾是戒禪師謝公却號邊羅漢  
草菴西山非兩人伯威十朋惟一轉其餘紛紛述難盡  
探樹得環如昏旦於事於理皆有之誰謂先生信夢幻  
謂幻雖謬真亦非盛德若愚聃所贊先生之道如泰山



何妨自視等愚賤漫叟吾愛次山公散人誰及江湖彥  
千秋復覩陸與元一記憑教譽與訕海市蜃樓不長久  
愚谷至今無改變先生寄託或在此癡人豈止隔一間  
戊午五言律詩

哭碭山楊明府吉公

爲政無多日千家有哭聲豈知求小邑真爲寫銘旌鼓  
罷琴猶在騎來馬尙鳴不須更聞笛對此若爲情

去尋衆香國寄到老僧衣果驗靈山夢何勞鵬鳥飛甫

任聞鵝鳴或曰鵬也夜夢菩薩指而謂曰汝亦靈山會上人又靈巖繼起和尚示寂時留法衣屬其門徒必寄揚於士亦適於是時奇到已知魂不返所慮櫬難歸谷口迢遙甚徐  
州故舊稀

輓徐母顧太夫人兼呈令子原一昆弟三太史

令德三吳重高門一代看市猶悲薤曲兒忍述熊丸形

管名雖大青松路最寒徒然傳孟母不復講周官

愁絕河東鳳悲號聲入雲歸天雖倏忽食報已豐殷會

塋皆名士哀歌過舊聞當時開後閣投轄任郎君

絳幔舊音容如今不可逢板輿香已散蒿里露初濃魂

去蓬萊島兒如華嶽峰唐詩天外三峰削不成翻憐徐孺子但爲

一林宗

貴未忘機杼賢偏敬草萊青蓮心可比貝葉手常開豈  
料升堂客今看負土回眼中芳草色依舊滿南陔

長塗



高臥竟難遂美名真不虞自憐同老馬未得別長塗  
詔類漢廷事賢誰龔勝徒私車乘自可安敢比醫巫

泊石佛閘遇任淑源

喜爾維官舫知予在客舟仁聲方滿路別恨屢驚秋  
菼明燈外樽疊古渡頭虛名真自誤不得遂淹留

夜過汪舟次寓舍適鄧孝威吳天章亦至因留飲

賦詩

老覺同心少宵驚天氣寒談深關出處坐久費杯盤  
賦似揚雄易才如樂毅難兵戈猶滿地莫只喜彈冠

客主同用被徵留長安

王欽文先生七十

先生年七十嘗自號匡廬跡類匡君隱家藏李氏書

朝廷問封禪長者意何如娛老惟經籍曾於此禮疎

泰山而號匡廬因云

先生年七十祖父篤忠貞門第三槐盛鬚眉四皓清魯

人傳世德天子重家聲笑指蓬萊路兒曹頂上行

子阮亭辭戶部郎中改官侍從

先生年七十曳杖愛鄉鄰飽食安期棗慵垂尙父綸  
松風華不注竹露小陽春坐滿呈詩客能輕放鴿人

施尙白少叅有惱予移寓較遠之作賦謝

眼底長安客相尋各有徒多君似皇甫獨自愛潛夫  
懊惱情何厚風騷調豈孤高軒休更誤筇杖尙能扶



附施少參詩

難得良朋近猶嫌見面疎今朝來覓伴昨日恨移居  
避客少閒地藏身存舊書醉歌狂自可莫是嘆無魚  
送鄭方旦虞部權稅韶州

快意誰兼得歸途是宦遊方旦家揚州梅花香嶺上雀舫過

沙頭使節仙郎貴文章賈客求詩朋應滿坐張相本韶州

虞帝經巡路韶音久不聞煩君彈古調所至起南薰水  
上珠光動山中蘭氣芬肯憐京洛客乞米日辛勤

題王咸中石鳴山房

西山舊遊處悔未到堯峰乍對王維畫王茂京原祜爲作石鳴山房圖

兼逢谷口農幽人肯招隱野老願爲傭更勸讀書暇多  
栽巢鶴松

王咸中山居與汪苕文民部爲隣見苕文留題池  
亭諸作心竊慕之因有贈

來往惟三益看君意最謙卜隣得王翰置酒待陶潛瓦  
上鳴松鼠林中吐桂蟾更逢詩伯至清興若爲添  
幾時來輦下何日返山中對食思雲子談冰畏夏蟲隣  
家真似社區宅本如雄久處紛華地難忘戰勝功

除夕飲吳維申舍人寓齋

日月除今歲京都滯此身不逢祭詩者誰召買獸人爆  
響聞朱戶儼名進紫宸王建宮詞金吾除夜進儼名回思太平事



對酒轉傷神

除夕更除愁新知勝舊遊為歡非博塞作戲一藏鈎簾  
動春風入杯寬臘味留看君詩興好不愧鳳池頭

戊午五言排律

題洗象圖

詭異復魁梧鞭騎有象奴荆山放無日臯澤養何須食  
物多繇鼻聞名善應呼來時望南海舞處是西都被誘  
因甘蔗離羣為美芻馴雌何不見獨立與誰俱拜定隨  
人意恩曾渥汝軀指揮煩教誨洗濯費工夫戰莫思身  
毒音捐竺二國名耕當助有虞但能勤報答豈在効馳驅燧尾  
時堪慮花牙我自吁老牛金在首弘景欲為圖

送宋牧仲員外權稅虔州兼寄懷易堂諸子

傳聞贛州路羽檄近來稀臺榭臨章水帆檣聚夕暉江  
行魚鳥狎南去雪霜微地煖嫌貂重峰高少雁飛朝  
廷倚籌畫關市有光輝謀國才須展論文事不違山川  
誰共賞者舊許相依謂彭躬菴魏凝叔和公會青藜諸子公事如多暇携  
尊訪釣磯

戊午七言律詩

贈高蒼巖蘇州太守

壯麗湖山對郡城公餘詩酒自平生客惟皮陸頻來往  
政視龔黃即弟兄塞馬幾年疲戰伐吳歌此日類昇平  
三公自是循良分白鹿何勞夾轂行



贈慕鶴鳴中丞

頻年羽檄滿江干吳楚封疆控引寬八座位高才不忝  
九重憂劇喜無難徐方麥黍侵河伯揚域金錢罄將壇  
凋瘵未蕪征稅急早聞尺疏達金鑾

閱邸報見羣公薦表濫及野老姓名將修辭啟先  
成二詩

浪得聲名悔已遲如今檄恐北山移自經亂後無恒產  
誤喜朝中有故知魏野方思看舞鶴莊周只願作生龜  
忽蒙匠石頻相顧櫟社神應替我悲

百歲風狂實可驚眼昏頭白骨崢嶸縱曾在位冠須挂  
豈合辭山網更櫻文舉何勞稱一鶚許繇長使憶三生

自樂天詩世說三生如不謬其疑巢許是前身魯郊金奏雖堪悅誰識當時海  
島情

見徵入京後作

百八十人何濟濟都矜博學且弘詞釣鰲客亦來龍伯  
賣屐翁初別劍池池在豐城杜詩貧窮老叟家賣屐謂王季友也高士儒林難

共傳柴車駿足敢同馳布衣老死甘雲壑豈料遭逢類  
荔支杜詩雲壑布衣船背死勞人害馬翠眉須蓋謂布衣終然永屈曾不如荔支遠入長安供翠眉之一

笑也余詩特反其意

壽馮易齋相公

齊魯山川鍾氣厚今皇稷契讀書多絲綸不放尋仙  
去吐握還如見士何報主鬚眉憑皓白安邊將相最



調和閒中細寫長生錄待看河清海不波

沙堤風景接瀛洲 賜酒頻繁禮數優早歲衣冠形玉

鏡用宋景事當朝姓字覆金甌人知儉德廳旋馬天與遐齡

杖刻鳩賀客不須圖老子相傳惟羨五湖遊

書懷

老日林泉味頗諳年來士卒戰猶酣身如橘柚病於北  
心似鷓鴣飛向南隴上全家能習苦牀前稚子待分甘  
出山久笑深源誤入肆將尋季主談

曾看作賦類俳優只藉長吟一散愁宋玉登朝寧有益  
陶潛在野本無求不聞老馬能千里敢慕仙人聚十洲  
得荷 君恩早歸去猶能擊壤海西頭

分米惟應比農父

漢章帝分梁漢儲米給民給錢亦許厠儒林

時蒙恩

諭令戶部月給應諸人銀三兩米三斗

詔素餐豈合詩人義偕隱難違老

婦心徑似南山防共笑賢如北郭擬相尋欲知莊舄甘  
貧賤抱病終朝作越吟

戊午五言絕句

題袁重其午日負母看花圖

此士讀何書孝經常在口將肩代板輿潘岳曾知否

富貴盈雙眼君看不值錢年過有虞氏時重其年六孺十母年九十

慕尚依然

葵榴仍滿園肩背乃空存重其母今歿已數年從此逢端午無心

弔屈原



戊午七言絕句

贈張幼南廷尉兼送之歸娶

茂年懷抱古人中最荷 官家眷待隆用法早齊于定

國薦賢新效狄梁公 所薦同鄉傳 學弘詞三人

廷尉君家舊有聲重聞掌法最寬平獨看結襪尋嘗事

未必王生勝李生 調富平 李子德

衰翁無夢到金臺也別山頭老鶴來珠履滿堂容列坐

就中相愛有鄒枚

遠赴東床事久遲昨朝新奏 九重知八鸞百兩侯門

事請為君歌大雅詩

滿河水凌歲將闌 賜得貂裘不畏寒華嶽經過如有

興驚人謝句待同看

鳴雁乘龍促馬蹄齊姜宋子小侯妻丈人從此思安坐

古稱朋友之父母 亦曰丈人丈母 何日邊頭靜鼓鼙

再逢項眉山學士 有序

項眉山學士出予舊所書扇示坐客自視十年前筆

蹟便似出他人之手至於扇上詩皆七言絕句又一

無忌諱而先生愛玩之至亦大異於人情矣因成六

絕以志感愧

再逢京洛亦前緣一別蒼茫已十年老衲菩提曾不長

偈成還似臥輪邊

潦倒麤疎一野翁揮毫任意懶求工竹頭豈料逢陶侃



漁父集 卷之六  
三

鬢尾何期遇蔡邕  
書家真贗久難明  
老眼今朝忽自驚  
錯認家鷄爲野鶩  
不知蝴蝶卽莊生

田翁叉手被人嗤

李後主不喜顏魯公書云  
叉手並脚一田舍漢耳

獨嗜瘡痂

恐太奇所喜全無科舉氣

唐人以書判取士故士  
大夫筆畫多科舉習氣

若論

點畫竟何知

世情誰不厭疎狂  
每嘆前賢命可傷  
那有波瀾並曹植

東坡詩却卷波瀾入  
小詩謂作絕句也

何曾懶慢責嵇康

老懶惟應着鶡冠  
何心作賦對金鑿  
自知在世無多日  
再爲先生寫白團

題毛會侯明府小像

戴笠垂竿圖

與君相見在金門  
人夜銜杯共笑言  
有手應操燕許筆  
持竿尙憶釣魚村

曾傳佳政入歌謠  
暇日臨流興頗饒  
一自明廷愛垂釣  
不須陽晝說陽橋

早晚看君坐石渠  
漁竿從此恐須疎  
朝中若是逢楊暨  
莫道君威勝大魚







